

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaa ra Pablo tan ra cutahán tsihin ra iin carta cuenda nyivi yihí tuhun Nyoo

¹ Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

Vaha xaan tsinú iñi nyivi Tesalónica tsi Nyoo

² Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo. ³ Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñi ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo. ⁴ Tyin tsitó ndi tyin Nyoo cuñi xaan ra tsi ndo, nyoocho yañi, tan maa ra nacatsi vaha tsi ndo. ⁵ Tyin quivi cahan ndi tuhun Nyoo, nácaa jacacú ra tsi yo, tsihin ndo, cahan ndi tuhun tsihin tunyee iñi Tatyí li Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoo ndi quivi tsiyucu ndi

tsihin ndo. Tsicoo ndi tacan tsa cuenda tsa vaha tsi maa ndo.

⁶ Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin sii xaan cuñi ndo tyin maa Tatyí li tsahá can tsi ndo. ⁷ Tan tsa tacan iyó ndo, jatyinyeé xaan ndo tsi tandihi nyivi yihí cuenda Nyoo tanii cahnu Macedonia tan tanii cahnu Acaya ihya, tyin nyehé ñi cuhva iyó ndo tsihin Nyoo. ⁸ Ñavin Macedonia tan Acaya ñi, maa tyin tandihi ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñi tsi cahan ndi tuhun Nyoo tsihin ñi. ⁹ Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihi tucu ñi tsihin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito. ¹⁰ Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

2

Tyiñu jahá ra Pablo ñuu Tesalónica

¹ Nyooho yañi, tsitó ndo tyin ñavin tsa cuatu quitsi ndi cahan ndi tuhun Nyoo ñuu ndo. ² Tyin tsitó ndo nácaa nyehe ndi tundoho jahá nyivi ñuu Filipo tsa ndi cumañi ca tsaá ndi ñuu ndo. Tan vasu

nyehē xaan ndi tundoho ñuu can, maa tyin quiví tsaā ndi ñuu ndo cahan ndi tuhun Nyoo tsihin ndo tsihin tsa ña yuuhví ndi. Tan vasu xaan xaan cuñi nyiví ñuu ndo, maa tyin jatyinyee xaan Nyoo tsi ndi tan ñi ñi ndi jacoto ndi tsi ndo cuhva jacacú ra tsi yo. ³ Tyin tuhun tsa tsaha cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsica ñi ndi. Tan ndi ñavin tsa cuñi ndi jandavi ñaha ndi tsi ndo. ⁴ Nduve tsa ña vaha cahan ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñi ndi tsa vaha cahan nyiví tuhun ndi, maa tyin cuñi ndi tsa vaha cahan Nyoo tuhun ndi, tyin maa ra nyehé ra cuhva iyó yo. ⁵ Tan tsitó ndo tyin ndi iin tsaha tan ña cahan ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cahan ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya. ⁶ Tan ndi iin tsaha ña nducu ndi cuhva jacahnu nyiví tsi ndi, ndi nyoocho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi. ⁷ Tan vita cahan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyinyee ndi tsi ndo. ⁸ Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuanda ñayiví iyó ndi tsa cuenda tsa cuñi ndi tsi ndo. ⁹ Nyoocho yañi, nducuhún ñi ndo nácaa jahá tyiñu ndi tan tsatsi ndi quiví tsiyucu ndi tsihin ndo.

Jahá tyiñu ndi tsinu cahñi tan tsacuaa tyin ña cuñí ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰ Tan nyoocho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quiví tsiyucu ndi tsihin ndo tsa cuví ndo nyiví tsinú iñi tsi ra Cristo. Maa tyin maa ñi maa cuhva cuñí Nyoo javahá ndi, tan yacan cuenda ña cuví cahan ndo tsi ndi. ¹¹ Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iin rayi tsa iyó sehe tsahá ra tunyee iñi tsi sehe ra. ¹² Tan catyi ndi tsihin ndo, catsi coo ndo tumaa taahán tsi coo nyiví yihí cuenda Nyoo. Tyin maa Nyoo cana tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quiví tsiñi ndo tuhun ra tsa cahan ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayiví cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasama cuhva iyó ndo. ¹⁴ Yahá can tan nyehe tucu maa ndo tundoho jahá nyiví ñuu ndo. Tumaa tsa nyehe nyiví yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyiví Israel. ¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahañ tsanaha. Ñi Israel can tsinyaa ndaha ñi tsi ndi. Ñavin cuhva cuñí Nyoo iyó ñi. Tan xaan iñi ñi tsi tandihí maa nyiví. ¹⁶ Tatun cuñí ndi cahan ndi tuhun Nyoo tsihin nyiví tsa ñavin

ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahan ra Pablo tyin cuñí ra cunyehe ra nu yucú nyiví Tesalónica inga tsaha

¹⁷ Nyoocho yañi, tsa yahá tsa quita ndi ñuu ndo juhva quiví, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa nñi iñi ndi cuñi ndi cunyehe ndi nu yucú ndo inga tsaha. ¹⁸ Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihí ñi tsaha tsa cuñi ndi quitsi ndi, ña tsahá nu ña vaha. ¹⁹ Maa tyin ¿náa ndatú ndi? Tan ¿yóo cuenda cusñi iñi ndi, tan vaha cuñí ndi? ¿A ñavin tsa cuenda maa ndo cua cusñi xaan iñi ndi nuu Jutu Mañi yo Jesucristo quiví quitsi ra inga tsaha? ²⁰ Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sñi xaan cuñí ndi tsa cuenda yacan.

3

¹ Tan ña cunyehe ca iñi ndi tsa cuñí ndi coto ndi nácaa cuahán tsinú iñi ndo tsi Nyoo. Tan tyaá ndi cuhva tsa ndoo intuhun ñi maa yu ñuu Atenas.

² Tan jaquitsi yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca

iñi ndo tsi Nyoo. ³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyoocho tsitó ndo tyin nyaá tsa nyehe yo tundoho. ⁴ Tyin nda ndi yucú ca maa ndi tsihin ndo, tan cahān ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuvi. ⁵ Ña cunyeē ca iñi yu tsa cuñí yu coto yu nácaa yucú ndo. Yacan cuenda jaquitsi yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuvi, tsa cuatu ñi jahā tyiñu ndi nu yucú ndo.

⁶ Maa tyin vityin tsa tsaa nuhu ra Timoteo tsa quitsi ra nu yucú ndo. Tan nacatyí tuhun ra tsihin ndi tyin nñi xaan iñi ndo tsinú iñi ndo tsi Nyoo. Tan cuñí tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñí xaan ndo nyehe ndo tsi ndi; tumaa tsa cuñí tucu maa ndi nyehe ndi tsi ndo. ⁷ Yacan cuenda, nyoocho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñí ndi tsa tsitó ndi tyin nyoocho vaha tsinú iñi ndo tsi Nyoo tan ña nacoó ndo tsi ra. ⁸ Tyin tumaa tsa ndutsaa ñayivi iyó ndi cuñí ndi tsa tsitó ndi tyin nyoocho vaha tsinú iñi ndo tsi Nyoo. ⁹ Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sñi xaan cuñí ndi nuu Nyoo tsa cuenda tyin vaha cuahán ndo tsihin ra. ¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñí xaan ndi quitsi nyehe ndi tsi ndo. Tacan tan cuvi jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi

ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuví quitsi ndi nu yucú ndo. ¹² Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihi ca nyivi tumaa tsa cuñi maa ndi tsi ndo.

¹³ Tyin tacan tan cuiti coo ndo tsihin ra tyin tsa yaha janduvaha ra aña ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihi nyivi yihí cuenda ra.

4

Nacaa taahán iñi Nyoo coo yo

¹ Vityin nyooho yañi, tsihin sivi ra Jesús caahán ndaahví xaan ndi tsihin ndo tan tsicán ndi tsi ndo tsa ña jandihi ndo tsa iyó ndo tumaa tsa janaha ndi tsi ndo. Jañihi ca ndo nducu ndo cuhva coo vaha ndo nuu Nyoo tumaa taahán iñi maa ra.

² Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. ³ Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha aña yo nuu ra. Tan nyooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yí ñi cuví ra. ⁴ Tan nyooho yañi, intuhun intuhun ndo cuñi tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha. ⁵ Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá

nyiví ña yihí tuhun Nyoo. ⁶ Ndi intuhun ndo tan ña jandavi ñaha ndo tsi inga ca rayi tan coo ndo tsihin ñasihí ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahān ndi tsihin ndo. ⁷ Tyin Nyoo cana ra tsi yo tsa coo yo cuhva cuñí maa ra, tan ña javaha yo tsa caquiñi. ⁸ Yacan cuenda nyiví ña cuñí tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí li ra tsi yo. ⁹ Maa tyin tuhun tsa cuñí tahan yo tsi yo ña tsiñí ñuhu tsa tyaa yu itsi nu carta ihya. Tyin tsa janahā maa Nyoo tsi yo nácaa taahán tsi cuñi tahan yo tsi yo. ¹⁰ Tan nyoocho tsa tsitó maa ndo tuhun can tyin cuñí ndo tsi tandihí nyiví yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quiví. ¹¹ Ndūcu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahān ndi tsihin ndo quiví can. ¹² Tacan javaha ndo tyin tacan tan nyiví ña nacotó tsi Nyoo cua jaha ñi tsa ñayiví tsi ndo. Tan ña cua cumañi tsa cumañi tsi ndo.

Nacaa cua cuvi quiví quitsi Jutu Mañi yo Jesús inga tsaha

¹³ Nyoocho yañi, cuñí ndi tsa coto ndo nácaa taahán nyiví tsa tsa tsihi, tyin tacan tan ña ndu-cuihya iñi ndo tumaa cuihya cuñí nyiví ña cua nandoto tsa ña cua coo tsihin Nyoo. ¹⁴ Tumaa tsa tsinú iñi yo tyin tsihi ra Jesús tan nandoto ra, tacan

tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

¹⁵ Yacan cuenda catyí ndi tsihin ndo tumaa jacuaha Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan nacoo yo tsi nyivi tsa tsihi. ¹⁶ Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto. ¹⁷ Yahá can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuui yo tsihin ra. ¹⁸ Yacan cuenda jandu iin tahan ndo iñi ndo tsihin tuhun ihya.

5

¹ Nyooho yañi, ña ñiñi cuñi tsi jacoto yu tsi ndo ama cua cuvi tandihi tsa tsa yahá cahan yu tuhun tsihin ndo. ² Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihví ñasuhu yuvehe yo tsa tsacuaa tacan cua cuvi. ³ Tyin quivi tsa catyí nyivi tyin taxin ñi caa, tan nduve maa tsa yuuhví ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhví tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi. ⁴ Maa tyin nyooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihví ñasuhu yuvehe ñi tyin nyooho

ñavin ca nu naa iyó ndo. ⁵ Tyin tandihí yo tsitó yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyívi ña nacotó tsi Nyoo. ⁶ Yacan cuenda catsi coo ndo coonyito ndo tan ña cusu ndo tumaa iyó nyívi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha. ⁷ Tyin nyívi quixí, quixí ñi tsacuaa, tan nyívi tuhva tsihí nyixi, tsiñi ñi tsacuaa. ⁸ Maa tyin yoo tsa cuví yo nyívi iyó tsinu cahñi, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandihí nyívi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo. ⁹ Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jaha ra. ¹⁰ Tyin ra Jesucristo tsihí ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihí yo, a nyito yo, maa tyin tandihí yo cua coo yo iin caa ñi tsihin ra. ¹¹ Yacan cuenda jandu iin ndo iñi nyívi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsahá cuenda ra Pablo tsi nyívi yihí cuenda Nyoo

¹² Nyooho yañi, caahán ndaahvi xaan ndi tsihin ndo, jaha ndo tsa ñayívi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha. ¹³ Cuñi tsi tsa jaha xaan ndo tsa ñayívi tsi

ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tyiñu tsi ndo yañi, jachahan ndo tsi nyivi ña cuñi jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyivi.

¹⁵ Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Nducu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihi ca nyivi.

¹⁶ Cusi iñi ndo tandihi ñi quivi. ¹⁷ Tan ña jandihi ndo tsa tsicán tahvi ndo tsi Nyoo. ¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuví yo nyivi tsinú iñi tsi ra Cristo Jesús.

¹⁹ Ña ndahva ndo ñuhu Tatyí Ii Nyoo tsa iyó aña ndo. ²⁰ Ña vacu nducu ndo tsa caahán ra cuví ndusu yuhu Nyoo. ²¹ Nyehe jihna ndo tun tandihi tsa caahán ra tan vaha tsi tumaa tsa taahán tsi nyehe ndo tandihi inga ca tuhun. Tan naquihin ndo tsa vaha. ²² Ña tyihi ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo aña yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra aña ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha. ²⁴ Ra tsa cana tsi yo, cuví

cuita iñi yo tsi ra, tyin maa ra cua javaha tandihí
maa tsa caahán yu ihya.

*Nu ndihí cahán ra Pablo tan tsahá ra nacumi tsi
nyiví*

²⁵ Yañi, ndácan tahvi ndo tsa cuenda ndi.

²⁶ Tan cùhva ndo nacumi tsi tandihí nyiví yihí
cuenda Nyoo.

²⁷ Tavá tyiñu yu tsi ndo tsihin sivi Jutu Mañi yo
na cahvi ndo carta ihya nuu tandihí nyiví tsa yihí
cuenda Nyoo.

²⁸ Tan maa Jutu Mañi yo Jesucristo nasoco tsi
ndo.

Tan na cuvi tsi tacan ñi.

**Tuhun tsaa tsa naco jutu mañi yo Jesucristo
tsi yo
New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c270ec54-172a-541f-83e6-7760f619c744